

Daeglungz Cojgvaq

Ngoenzneix, gou caeuq bohmeah caez bae bouqhaeux laj laeuz gwn haeux. Gwn liux le dou couh byaij ma ranz lo, youq gwnz loh sawqmwh bungz doengzhag gou Daeglungz.

Daeglungz raemxda rim da, yienghceij de cojgvaq dangqmaz. Bingzseiz youq hagdangz, Daeglungz couh lumj coh de ityiengh, dwg duzlungz vaiqvued ndeu, coengzlaiz mbouj raen de yienghneix siengsim gvaq. Gou raen geizgvaig, cam de: “Daeglungz, mwngz baenzlawz la?” Daeglungz sikhaek raemxda doekbyoegbyoeg, de doq daej doq gangj: “Bohmeah gou doxceng lo, gyoengqde naemj lizvwnh……”

Dou riengz laeng Daeglungz bae daengz dieg bohmeah de doxceng haenx. Daxboh gou

lumhlumh gyauej Daeglungz, naeuz: “Vaiq bae giengqienq gyoengqde.” Daeglungz ngamq byaij dep daxmeh de, daxmeh de couh naeuz: “Dou mbouj aeu mwngz lo!” Daeglungz engqgya nanzgvaq lo, ndwn gwtngwt youq henz, mbouj gamj gangj saek coenz, raemxda lae mbouj dingz. Daxmeh gou ngamq siengj gangj di gijmaz, daxboh Daeglungz couh naeuz: “Mbouj gven sou saeh, sou vaiq baema.” Dou cijndaej lizhai lo.

Youq gwnz loh maranz, gou itcig siengj Daeglungz, raen de caen dwg cojgvaq lai lo. Maqmuengh bohmeah Daeglungz caeux di doxndei, aenvih lwgnyez miz bohmeah gyaenz, miz bohmeah ndiep cij vuenyungz ha!

(Cangh Yinhyij raiz Ouh Caijfangh hoiz)



Geiq Saeh Mbaw-faex Iq Bae Louz


Mbwn ngoenz beij ngoenz liengz lo, rumzcou ci daeuj lo. Miz ngoenz ndeu, mbawfaex iq lijhai le aen rungj daxmeh faexhung, gagdog bae louz lo.

Mbawfaex iq naengh youq gwnz aenci rumz, daeuj daengz gyang mbwn. De caeuq daxgoeng daengngoenz doengzcaeaz menhbyaij, caeuq dahcej fwjhaue doengzcaeaz diuqfoux, caeuq daegnuengx ndaundeij doengzcaeaz ciengqgo, fiengx le, couh dinghyouq dingq daxbuz ronghndwen gangj gojgaeq. Dingq yaep ndeu liux, mbawfaex iq couh youq ndaw rungj daxbuz ronghndwen ninznaek lo, lij guh baez fangzhwnz ndei ndeu.

Ngoenz daihngeih banhaet, mbawfaex iq lijhai le gyoengq baengzyoux de, doek daengz gwnz gaiq diegrum ndeu. Duz moed iq dawz de dangguh aen yindungcangz, youq gwnz haenx buet bae buet dauq; duz daekgaeuj dang de guh aen liengj iq, aeu daeuj dangj rumz dangj fwn; duz mbaj iq dang de guh mbaw damjdeih, naengh gwnz de yietnaiq. Seizneix, mbawfaex iq baengzyoux engq lai lo, de simmaez dangqmaz bae!

Mbawfaex iq diuq daengz ndaw naz, sawqmwh dingqnyiz miz vunz caeuq de gangjvah. De ngeux gyauej dauq baez yawj, yienzlaiz dwg duz nonheu iq ndeu. Seizdoeng yaek daengz lo, mbwn ngoenz beij ngoenz nit, mbawfaex iq bienqbaenz fanmoeg duz nonheu iq. Duz nonheu iq lau mbawfaex iq deng nit, couh caeuq mbawfaex iq doengzcaeaz ndonj haeuj ndaw namh bae, doxiu bilaeng seizcin caiq doengzcaeaz guhcaemz.

(Gu Yinjgyah)



Dienhdaeng guhlawz rongh ndaej ne? Boh naeuz dienh dwg dai dienhsienq ndonj haeuj ndaw bopdaeng bae, yienghneix dienhdaeng couh rongh lo.

Dienh ak lai bw. Boh lwnh gou, miz dienh le, souhyinhgih cij rox gangj vah guhfwen, vunz ndaw dienh'ingj cij rox ning rox cak.

Dienh ndaej coengh bouxguhnaz nienj haeux muz mienh, ndaej coengh bouxguhhong hai gihgi; dienh ndaej hawj aenrug ndatyanyan bienq liengzsis, ndaej hawj aenrug nitsisi bienq raeujrubrub. Gij saeh dienh rox guh de, sam ngoenz sam hwnz gangj cungj gangj mbouj liux.

Hoeng yiengh dienh baenzlawz ne? Gou mboujcaengz ndaej raen gvaq. Boh naeuz, dienh yawj mbouj raen ne.

Yawj mbouj raen, lumh ndaej lwi? Boh naeuz, goj lumh mbouj ndaej go, dienh mbouj ngah hawj vunz lumh de go. Vunz lumh de le, de couh hozndat, yaek coemh vunz, mbangseiz lij coemh vunz dai bae dem bw. Va, dienh hoznyaek baenzneix dwglau baenzneix.

Yienznaeuz gou caengz ndaej raen dienh nauq, hoeng gou muengh shwgeij bienqbaenz dienh.

Gou bienqbaenz dienh le, couh ndaej

bae coengh bouxguhnaz nienj haeux muz mienh lo, couh ndaej coengh bouxguhhong hai gihgi lo. Gou yaek deuz le, gyoengqde couh mbouj hoj gyo'mbaiq gou nauq, aenvih gyoengqde yawj mbouj raen gou. Langhnaeuz bouxguhnaz, bouxguhhong yawj ndaej raen gou, couh rox gyo'mbaiq gou dahraix, nyaenx gou couh rox najnyaenq lai lo! Boh naeuz, vunz coengh raeuz le, raeuz deng gyo'mbaiq vunz; hoeng raeuz coengh vunz le, couh gaej heuh vunz gyo'mbaiq raeuz nw.

Gou bienqbaenz dienh le, fawhndat, gou couh dawz doenghgij rug ndatyanyan de bienq liengzsis bae dahraix. Fawhndat, gou couh dawz doenghgij rug nitsisi de bienq raeujrubrub bae dahraix. Vunzlai cungj mbouj rox dwg gou guh, hoeng vunzlai cungj youq ndei youq soeng, yienghneix couh ndei lai lo.

Mwh beixmbauq cuengqhag dauqranz, gou couh hawj souhyinhgih guhfwen, haenqsing cam beixmbauq naeuz: “Beix yawj raen gou lwi? Beix rox gou youq gizlawz lwi?” Gou yawjaen beix, hoeng beix yawj mbouj raen gou, mizyinx lailai bw. Langhnaeuz beix lumj guh gaemhndoj yienghde lox gou naeuz: Beix yawjaen nuengx lo, nuengx youq gizde, beix yawjaen lo, nuengx okdaeuj rouz di vei. Gou coj mbouj saeng de nauq, aenvih dienh yawj mbouj raen go, bouxlawz lij hawj de yaeuh ne. Beixmbauq mbouj miz banhfap saek di, aiq rox ndonj haeuj laj mbonq bae ra gou bw, gou couh rox riu ok sing dahraix. Riu ok sing goj mbouj lau ne, fanjcingq beixmbauq yawj mbouj raen gou, aenvih gou dwg dienh, mizyinx lailai bw.

Hoeng, bienqbaenz dienh le mbangbaez goj mbouj ndei geijlai. Gou bienqbaenz dienh le, couh mbouj ndaej naengh youq gwnz gyauejhoq daxboh dingq daxboh gangj gojgaeq lo; goj mbouj ndaej cup daxmeh, mbouj ndaej demh gwnz gen daxmeh ninz lo. Aenvih dienh mbouj ngah hawj vunz red, red deng le de couh coemh vunz, gou guhlawz ndaej hawj bohmeah deng coemh ne? Langhnaeuz gou bienqbaenz dienh dahraix le, gou couh mbouj hoznyaek baenzlai lo, mbouj dwglau baenzlai lo.

(Daj 《Bonjsei Sim Lwgnyez》 (Veiz Gizlinz raiz) senj okdaeuj, Lwgfwnz-meh/卢奋长 hoiz)